

ጾኑሲ ማደ"ም ዳኪንቴ ጳውሎስ ቤርታሲ ቴሰሎንቄ ዓሶም ዳኬ ኪኢቶ" ዓይያ ካሮ"

ቴሰሎንቄ ጌይንታ ካታሜላ ሮሜ ዓጮ" ካኣቲ ዋይህ፥ ማቄደኒያኮ ጳኤፖ ካታሜሎኬ። ጳውሎስ ቴሰሎንቄይዳ ሺኢጲያ ማኣሮ ዔቁሴህ' ፒልጲሲዮሴ ዓጮ" ሓሺ" ዳንዳህኪ ገንፃፓኬ። ዬይ ያዲ ማዔቴያ ዓይሁዶ ካኣዦይዳ ጌሊ ካኣሽካኒ ዑኬ፥ ዓይሁዳ ማዒባኣ ዓሳ፡- ጳውሎስ ኬኤዛ ጉሙርቁያ ሓይሶ ዛሎ" ዋይዚ ዒዛ ባንህ ማዓኒ ማሌህሮ ዓይሁዶ ዓሳ ቁኢሪ ጳውሎስ ዓይህሮ ጳውሎስ ቴሰሎንቄ ሃሺ" ቤኤሪያ ዓኣዳኒ ዳንዳዔኔ፤ ዬካፓ ቆሮንቶሴ ዓጮ" ዒ ዓኣዲ ዓኣንቴ ዒዛና ዋላ" ማዳ፥ ያሞቴዎሴ ቴሰሎንቄ ሺኢጲያ ማኣሮ ዛሎ" ባኣዚ" ፓይዲ ፓይዲ ዒዛም ፃኣፔ።

ጳውሎስ ቤርታሳ ኪኢቶ" ቴሰሎንቄ ዓሶም ፃኣፔህ' ኪሪሰቶሴ ጉሙርቁያ ዓሶ ደዲሻኒኬ፤ ዔያቶኮ ኪሪሰቶሴ ጉሙርቁህና ናሹሞዋ ዓኣያ ማዔህ ዋይዜህሮ ጾኑሲ ዒ ጋላታኔ፤ ዒዚ ዔያቶ ባኣካ" ዓኣ ዋደ"ና ዋማይዲ ናንጌቴያ ዔያቶም ጳቁህ ኬኤዛኔ፤ ዬካፓ ኪሪሰቶሴኮ ላሚ ማዒ ሙኪያ ዛሎ" ጾኑጨንቴ ጾኑጨያኮ ማህ ኬኤዛኔ፤ ዬንህ ጾኑጨያንህዳፓ ፔቴ" ፔቴ"ዘንህ፡- «ኪሪሰቶሴ ላሚ ሙካንዳህኪ ቤርታ ሓይቄ፥ ዒዛ ጉሙርቁያ ዓሲ ኪሪሰቶሴኮ ማዒ ሙኪያ ዒንጋንዳ ናንጌና ናንጎ ዳንቃኒ ዳንዳዓ? ኪሪሰቶሴ ማዒ ሙካንዳህ ዓይዳዳይ?» ጋዓዘንህኬ። ጳውሎስ ዬንህ ጾኑጨያንህዳፓ ዔቁ፡- «ኪሪሰቶሴኮ ላሚ ሙኪያ ሃጊ ማዓንዳ ዋዛና ካፒ ካፒ ዬማ ሄላ"ንዳኣና ዚቴዮ ጌዒ ማደ" ዒንህኪ ማደ"ዋቴ» ጌይ ዔያቶ ዘራ።

ማፃኣፔላ ዲማ ዲማ ዓርቄ ባኮ

- ዓይያ ካሮ" 1፡1
- ቴሰሎንቄ ዓሶ ዛሎ"ሮ ጳውሎስኮ ጋላቶ" 1፡2—3፡13
- ቴሰሎንቄ ዓሶም ዘሮና ዘሮ 4፡1-12
- ኪሪሰቶሴኮ ላሚ ሙኪያ ዛሎ" ኬኤዚንቴ ሓይሴ 4፡13—5፡11
- ጋፒንህ ዘሮ 5፡12-22
- ጋፒንህ ሓይሴ 5፡23-28

1 የኦሲ፡ ዓዳሢና ጎዳ ዬሱስ ኪሪስቶስና ማዕፌ ቴሰሎንቄ ሺኢጲያ ማኣሮ ዓሶም፤ ጳውሎስና ሲላሲና ጃሞቴዎስናይዳፓ ዳኪንቴ ኪኢታ፡- የኦሲኮ ኮሹሞ ዒንጊፃ ዒንሢሣም ማዎንጎ።

ቴሰሎንቄ ዓሶኮ ናንጎና ጉሙርቂፆና ዛላ

2 ቢያ ዎዴ ኑ ዒንሢ ዛሎ" ሺኢቃኣና ዒንሢ ዛሎ"ሮ የኦሲ ኑ ጋላታኔ። 3 ዒንሢ የኦሲ ጉሙርቂፆና ዎማይዲ ማዳቴያ ሐሣ ናሹሞና ዎማይዲ ላቢ" ማዳቴያ ጊንሣ ሃሣ ጎዳ ዬሱስ ኪሪስቶስ ዛሎ"ና ዒንሢከ ዓኣ ሃጊ ማዓንዳ ዎዛ" ዎማዒ ዶዲ ማዕቴያ ኑ ጎዳሢና ኑ ዓዳሢና ቤርታ ቢያ ዎዴ ኑ ጳቂሣኔ። 4 የኦሲ ዒንሢ ናሽካ፣ ታ ዒሹንሣ! ታ ሚሹንሣ! የኦሲ ዒንሢ ዶኦሬሢ ኑ ዔራኔ። 5 ዎይቲ ጌዔቴ ኑኡኒ ኮዡ ሐይሶ ዒንሢም ኬኤዘሢ ዳንጋና ሌሊቱዎንቴ ዓያና ጌኤሽ ዛላና፤ ሐሣ ዓያና ጌኤሽ ዒንጌ ዎልቁና ዬያጉዲ ሃሣ ኮዡ ሐይሶኮ ጎኩሞ ዔሪ ጉሙርቂሢናኬ። ዒንሢና ዎላ" ኑ ዓኣ ዎዶ"ና ዒንሢ ዛሎ" ጌዒ ዎይቲ ኑ ናንጌቴያ ዒንሢ ዔራኔ። 6 ዎዚ ዒንሢ ሚርጌ ማታ ሄሌ"ቴያ ዓያና ጌኤሽ ዒንጋ ዎዛና ቃኣሎ" ዎይዚ ዔከ፣ ኑናንታ ጎዳ ዬሱስ ኪሪስቶስንታ ማዳ ጎይያ ዒንሢያ ማዳያ ማዕኔ። 7 ዬያይዳፓ ዔቁያና ማቁዶኒያና ዓካይያናይዳ ዓኣ ኪሪስቶስ ጉሙርቂዎንሢም ኮሺ ኮኣኪንሢ ዒንሢ ማዕኔ። 8 ጎዳኮ ቃኣላ" ዒንሢዳፓ ኬሰኪ ዎይዘንቴሢ ማቁዶኒያና ዓካይያናይዳ ሌሊቱዎንቴ የኦሲ ጉሙርቂፆ ዒንሢኮ ቢያ ቤዛ ዔርቴኔ፤ ዬያ ዛሎ" ሚርጌ ኑ ኬኤዛንዳያ ኮይሱዎሴ። 9 ኑኡኒ ዒንሢ ኮይላ" ሙኬ ዎዶ"ና ዎማይዲ ዒንሢ ኑና ሹኦቹንሢ ዔኬቴያ፤ ናንጊና ባይቁዎያ ሐሣ ጎኔ ማዕፌ የኦዛሢም ማዳኒ ማሌ" ካኣዡይዳፓ የኦዛሢ ባንሢ ዎማይዲ ዒንሢ ማዕቴያ ዓሳ ፔ ቶኦኪና ማርካዳኔ። 10 ዬያጉዲ ሐሣ ሐይባ"ፓ የኦሲ ዔቁሴም ዔቁ፣ ሙካንዳ የኦሲ ጎሪ"ንታፓኣ ኑና ዳቂሻንዳ፣ የኦሲ ናዓሢ ዬሱሴኮዎ ጫሪንጫፓ ማዒ ሙኪያ ዎማይዲ ዒንሢ ካፓቴያ ዔያታ ማርካዳኔ።

2

ጳውሎስ ቴሰሎንቄይዳ ማዳ ማዳ"

1 ታ ዒሹንሣ! ታ ሚሹንሣ! ኑኡኮ ዒንሢ ኮራ ሙኪያ ጉሪ ዓተባኣያ ማዕሢ ዒንሢ ዒንሢ ቶኦኪና ዔራኔ። 2 ዒንሢ ዔራ ጎይያ ሐያኮ ቤርታ ፒልጲሲዮሴይዳ ኑ ዓኣ ዎዶ"ና ማቶና ጫሽና ኑና ሄሌ"ኔ፤ ጋዓንቴ ዎዚ ዳኤፒ ዒፂሢ ኑና ሄሌ"ቴያ የኦሲኮ

1:1 ዳኪ. ማዳ" 17:1። 1:6 ዳኪ. ማዳ" 17:5-9።

ኮዦ ሐይሶ ኑ ኬኤዛንዳጉዲ ዒዚ ኑም ጫርሹም ዒንገኔ።
 3 ኑኡኒ ዒንሢ ዘሪሢ፡- ደቢንቲና ሃሣ ፑርታ ማሊሢና ዔቁቲቀሴ፤
 ሐሣ ኑ ዒንሢ ገሻኒ ማዳ ባኣዚ" ፔቴ"ታዖ ባኣሴ። 4 ባሼና
 ኮዦ ሐይሶ ቃኣሎ" ኑ ኬኤዛንዳጉዲ ያኑሲ ኑም ዒንገሢ ኑ
 «ዳንዳዓንዳኔ» ገይ ጉሙርቂታሢር ኑ ኬኤዛኔ፤ ዬያ ኑ ማዳሢ'
 ኑኡኮ ዒኖ ዛገ ዔራ፡ ያኣዛሢ ዋዛሳኒ ገይ ማዓንዳኣፓዓቲም
 ዓሲ ዋዛሳኒቲቀሴ። 5 ዒንሢ ኑ ገሺ ሐሣ ማኢሽ ዴንቃኒ ኬኤዚ
 ሃንቲባኣሢ ዒንሢ ዒ'ንሢ ቶኦኪና ዔራኔ፤ ያኑሲያ ኑኡኮ ማርካኬ።
 6 ኑኡኒ ኪሪሰቶሴም ዳኪንቲ ማዳያ ማዔ ጎይያና ኑ ዒንሢ
 ቢያ ባኣዚ" ያኡጫኒ ዳንዳዓያታዖ ዒንሢዳፓ ማዔቲያ ማሌ" ዖ
 ገዳፓኣ ቦንቾ ኑ ኮይባኣሴ። 7 ጋዓንቲ ፔኤኮ ዲቻ ናኣቶ"ም
 ማላ ዒንዳሎጉዲ ዒንሢም ኑ ማጨንታያ ማዔኔ። 8 ሐሣ ኑ
 ዒንሢ ማርገና ናሽካሢር ዴኤፖ ናሹማፓ ዔቁያና ያኑሲኮ ኮዦ
 ሐይሶ ቃኣሎ" ኬኤዚያ ሌሊቲቀንቲ ዒንሢ ዛሎ" ሐይቃኒታዖ ኑ
 ገኢገንቲንቲኬ። 9 ታ ዒሾንሦ! ታ ማሾንሦ! ኑኡኒ ዋማዲ ማዳቲያ
 ሃሣ ላቤ"ቲያ ዒንሢ ዔራኔ፤ ያኑሲኮ ኮዦ ሐይሶ ዒንሢም ኑ ኬኤዛ
 ዋዶ"ና ዒንሢዳፓ ፔቴ" ዓሲምታዖ ኑ ኬዲ ማዑፑጉዲ ቀንቲና
 ርኣሪና ኑ ዋይዖር ማዲ ማዲ ኑ ላቤ"ኔ።

10 ዒንሢ፡ ኪሪሰቶሴ ጉሙርቂታ ዓሰ ባኣካ" ኑ ናንገ ዋዶ"ና ዋይቲ
 ኑ ያኑሲም ዲማዳያና ዲሎ" ማዒ ሃሣ ዒኢሳ ባኣዚ" ባኣያ ማዒ
 ናንገቲ ዒንሢ ዒንሢ ቶኦኪና ዔራኔ፤ ሃሣ ያኑሲያ ዬያኮ ማርካኬ።
 11 ዓዴ ፔኤኮ ናኣቶ"ም ማዳሢ ጎይያ ኑኡኒያ ዒንሢ ፔቴ" ፔቴ"ሢም
 ዋማይዲ ማዳቲያ ዒንሢ ዔራኔ፤ 12 ቢያ ዋዴ ኑ ዒንሢ ዘሪ ዘሪ ሐሣ
 ደዲሺ ደዲሺ ፔኤኮ ካኣቲቀና ቦንቾናይዳ ዒንሢ ገላንዳጉዲ
 ዒ'ንሢ ዔኤሌ"፡ ያኣዛሢ ዋዛሳ ጎይሢ ናንጉፑቲ ገይ ኑ ዒንሢ
 ሺኢቁሢ ዒንሢ ዔራኔ።

13 ሐሣ ኑ ዒንሢ ዛሎ" ቢያ ዋዴ ያኑሲ ጋላታ ባኣዚ" ዓኣኔ፤
 ዬይያ፡- ዒንሢ ኑ ገዳ"ፓ ዋይዜ ያኑሲ ቃኣሎ" ጉሙርቂ ዔኬ
 ዋዶ"ና ኪሪሰቶሴ ጉሙርቂ ዓሰይዳ ማዳ፡ ዬያ ቃኣሎ" ጉሙርቂ
 ዒንሢ ዔኬሢ' ዓሲ ሐይሴ ማሃቲቀንቲ ያኑሲ ቃኣላ ማሃኬ፤ ጎኔና
 ዬይ ያኑሲ ቃኣላኬ። 14 ታ ዒሾንሦ! ታ ማሾንሦ! ዒንሢ ዪሁዳ
 ዓጮ"ይዳ ዬሱሰ ኪሪሰቶሴና ዓኣ ያኑሲ ጉሙርቂ ሺኢዲያ ማኣር
 ዓሰጉዲ ማዔኔ፤ ዋይቲ ገዔቲ ዔያቶ ዪሁዳ ዓጮ"ይዳ ዓይሁዶ
 ዓሳ ማታሴሢጉዲ ዒንሢያ ዒ'ንሢ ዒገና ማታሴኔ። 15 ዓይሁዶ
 ዓሳ' ጎዳ ዬሱሴና ያኑሲ ማሊያ ኬኤዛ ዓሰና ዋዳያ፤ ሃሣ ኑናኣ ዒዲ
 ዳኪ ፔ ዓጮ"ፓ ኬሴ"ዘንሢኬ፤ ዔያታ ያኑሲ ያዩሳያ ሃሣ ዓሲያ

2:2 ዳኪ ማዶ" 16፡19-24፤ 17፡1-9። 2:14 ዳኪ ማዶ" 17፡5።

ዲያክኔ፤ 16 ዔያታ ዓይሁዴ ማዒባኣ ዓሳ ዋይዚ ደቃንዳ ቃኣሎ" ኑ ኬኤዙዋጉዲ ላኣጋኔ፤ ዬያይዲ፣ ዓያታ ጎሜይዳ ጎሜ ቃሲ" ቃሲ" ዓኣዳኔ፤ ዬያሮ ሃሢ ጋፒንያይዳ ያኦሲኮ ጎሪ"ንታ ዶዲ ዔያቶ ሄሌ"ኔ።

ጳውሎስ ቴሰሎንቄ ዓሶ ለሚ ዴንዲ ዛጋኒ ኮዔሢ

17 ጋዓንቴታ ዒሾንሦ! ታ ሚሾንሦ! ዓያናናቴዋንቴ ዓሽኪና ዳካ" ዋዴ ኑ ዒንሢፓ ዲማዴቴያ ሃሢ ኑ ዒንሢ ሚርጌና ጳቂሢሢሮ ሙኪ ዒንሢ ዛጋኒ ዲቢ ካራ ኑ ኮዔኔ። 18 ዬያይዲ ዒንሢ ባንሢ ኑ ሙካኒ ማሌንቴኬ፤ ባሺ ታኣኒ፣ ጳውሎስ ዒንሢ ባንሢ ሙካኒ ለሚ ለሚ ኮዔንቴ ያላሄ ኑና ሙኮ ላኣጊ ቃዜኔ። 19 ማዔቴያ ኑ ጎዳሢ ዬሱሴ ሙኬ ዋዶ"ና ዒዛ ቤርቶይዳ ኑኡኮ ሃጊ ማዓንዳ ዋዞ" ማዓንዳሢ፤ ሃሢ ኑኡኮ ቦንቲንታኣ ያኦናዳይ? ዒንሢናቴዋዓዳ? 20 ጎኔና ኑኡኮ ቦንቶና ዋዞ"ኣ ዒንሢናኬ።

3

1 ዬያሮ ሓይካፓ ሴካ «ዒንሢ ባንሢ ኑ ሙካንዳኔ» ጌዒ ጌዒ ዴዓኒ ኑ ዳንዳዒባኣሢሮ ዓቴናይዳ ኑኡሮ ሌሊ ኑ ፓቂንቲ ዓታንዳያ ኮይሳሢ ኑም ዔርቴኔ። 2 ኑኡኮ ዒሻሢ፣ ሃሢ ኪሪሰቶሴኮ ኮዡ ሓይሶ ኬኤዚያና ኑኡና ዋላ" ያኦሲም ማዳያ ማዔ፣ ዲሞቴዎሴ ኑ ዒንሢ ኮይላ" ዳኬኔ፤ ኑ ዬያይዴሢ ዒንሢ ዒ ዶዲሻንዳጉዲና ያኦሲ ጉሙርቂያና ዒንሢ ዶዳንዳጉዲ ዘሮም ጌይኬ። 3 ዬይያ ዒንሢ ሄሌ" ሚታሢና ዒንሢ ያኦሲ ጉሙርቂያ ሃሾ"ዋጉዲ ማሃንዳኔ፤ ዬይ ሚታሢ ኑም ዒንጎና ባኣዚ" ማዔሢ ዒንሢ ዔራኔ። 4 ቤርታ ዒንሢና ዋላ" ኑ ዓኣ ዋዶ"ና ሚታ ኑና ሄላ"ንዳሢ ኑ ዒንሢም ኬኤዛኔ፤ ዒንሢ ዔራሢጉዲ ዬይ ሚታ" ኑና ሄሌ"ኔ። 5 ዬያሮ ሃይፓ ሴካ «ዒንሢ ኮይላ" ሙካንዳኔ» ጌዒ ጌዒ ዴዓኒ ታ ዳንዳዒባኣሢሮ ታኣኒ ዒንሢኮ ያኦሲና ዓኣ ጉሙርቂያ ዔራኒ፣ ዲሞቴዎሴ ዒንሢ ኮይላ" ዳኬኔ፤ ዒዛ ታ ዳኬሢ ዳቢሻኒ ጌሻሢ ዒንሢ ጌሹያ ናንዳኔ ሓሣ ማዳ"ኣ ኑኡኮ ጉሪ ዓቴ"ያ ናንዳኔ ጌይ ታ ሄርጌሢሮኬ።

ዲሞቴዎሴ ቴሰሎንቄ ዓሶ ዛሎ" ኬኤዜ ሓይሴ

6 ሓሢ ጋዓንቴ ዲሞቴዎሴ ዒንሢ ኮራፓ ሙኪ ዒንሢኮ ያኦሲ ጉሙርቂያና ናሹሞና ዛሎ" ዋዛሳ ሓይሴ ኑም ኬኤዜኔ፤ ባሺና ዒንሢ ቢያ ዋዴ ኑ ዛሎ" ሚርጌና ማላያ፣ ሃሢ ኑኡኒ ዒንሢ ዛጋኒ ጳቂሢሢሮ ዒንሢያ ኑና ዛጋኒ ጳቂሢሢሮ ዒ ኑም ኬኤዜኔ።

2:15 ዳኪ. ማዶ" 9:23፤ 13:45፤ 14:2፤ 5፤ 19፤ 17:5፤ 13፤ 18:12። 3:1 ዳኪ. ማዶ" 17:15። 3:6 ዳኪ. ማዶ" 18:5።

7 ይያር ታ ዒሾንህ! ታ ሚሾንህ! ዋዚ ኑኡኒ ሃሢ ዓኣሢ ዋኣዪሢ ማቶናይዳ ማዔቴያ ዒንሢኮ ጾኦሲ ጉሙርቂያ ዋይዚ ሃሢ ኑ ዶዴኔ።
 8 ዒንሢኮ ጎዳ ዬሱሴና ዶዲ ናንጊፃ ኑ ሃውሺ ናንጋንዳጉዲ ማሄኔ።
 9 ዓካሪ፡ ዒንሢ ዛሎ"ና ኑ ጾኦሲ ቤርታ ዴንቄ ዋዘ"ሮ ዒዛ ኑ ዋዚ ጌይ ጋላቶንዶይ? 10 ዋንቴና ሮኦሪና ዶዲ ኑ ሺኢቃሢ ዒንሢ ዛጋኒና ጾኦሲ ጉሙርቂያ ዛሎ"ና ዒንሢም ፓጩ ባኮ ኩንሢኒ ኑ ዳንዳዓንዳጉዲኬ።

11 ሐሢያ፡ ኑኡኮ ዓዳሢ ማዔ፡ ጾኣዛሢና ኑ ጎዳሢ፡ ዬሱሴ ኪሪሰቶሴና ኑ ዒንሢ ባንሢ ሙካንዳጉዲ ጎይፃ ኑም ጊኢጊሾንጎ።
 12 ኑኡኒ ዒንሢ ናሽካሢጉዲ ዒንሢኮ ዋለና ዓኣ ናሹሞና ማሌ" ዓሶ ዒንሢ ናሽካ ናሹሞ ጎዳ ዒንሢም ቃሲ" ሚርጊሾንጎ። 13 ኑ ጎዳሢ ዬሱሴ፡ ጾኦሲም ዲማዴዘንሢና ዋላ" ሙካኣና ኑኡኮ ዓዳሢ ማዔ፡ ጾኣዛሢ ቤርታ ቦሂሳ ባኣዚ" ባኣያና ጾኦሲም ዲማዴያ ዒንሢ ማዓንዳጉዲ ጾኦሲ ዒንሢኮ ዒሮ ዶዲሾንጎ።

4

ጾኦሲ ዋዛሳ ናንጊ

1 ዓካሪ ታ ዒሾንህ! ታ ሚሾንህ! ጾኦሲ ዋዛሳኒ ዋይቲ ዒንሢ ናንጋንዳጉ ኑ ዒንሢ ዔርዜኔ፤ ሐሢያ ዒንሢ ጎኔና ናንጋሢ ዬያ ጎይፃኬ፤ ጎዳ ዬሱሴ ሱንጾና ኑ ዒንሢ ሺኢቃሢና ዘራሢ ሐያኮ ቤርታ ዒንሢ ማዴሢዳፓ ባሼ ማዳንዳጉዲኬ። 2 ጎዳ ዬሱሴ ሱንጾና ዒንሢ ናንጋንዳ ጎይፃ ኑ ዒንሢ ዔርዜሢ ዒንሢ ዔራኔ።
 3 ጾኦሲኮ ማሊፃ ዒንሢ ዒዛም ዲማዴያ ማዓንዳጉዲና ዓኒ ሃህ ማቾ ማዒባኣያና ላሂሢፓ ሃካንዳጉዲኬ። 4 ዒንሢ ቢያሢ ዒንሢኮ ዑፃ ጾኦሲም ዲማዴያና ቦንቹንቴያና ማሂ ካፒሢ ዔራንዳያ ኮይሳኔ።
 5 ጾኦሲ ዔራሞ ዓሶጉዲ ዒንሢ ማሊፃ ሱኡኮ ኩንሢያ ማዒፖቴ።
 6 ዬያ ባኮና ጾኦሲያ ዳቢንቴ፡ ማሌ"ሢያ ጌሾፓ፤ ሐያኮ ቤርታ ኑ ዒንሢም ላቲ" ኬኤዜሢጉዲ ዬንሢ ባኮ ማዳዘንሢያ ቢያ ጎዳ ማቶ ሄሊ"ሳንዳኔ። 7 ዓይጎሮ ጌዔቴ ጾኦሲ ኑና ዔኤሌ"ሢ' ዒዛም ኑ ዲማዴያ ማዒ ናንጋንዳጉዲ ማዓንዳኣፓዓቴም ዒኣቲ ኑ ናንጋንዳጉዲቱዋሴ። 8 ዓካሪ ሃያ ዘሮ" ቦሂ ሃሻ"ሢ ጌኤኮ ዓያና ዒንጋ፡ ጾኦሲ ቦሃንዳኣፓዓቴም ዓሲ ቦሂባኣሴ።

9 ዋሊ ናሽከሢ ዛላ ዒንሢ ዒንሢሮ ጾኦሲዳፓ ዔሬያታሢሮ ዬያ ባኮ ዛሎ" ጾኦሲያ ዒንሢም ፃኣፓኒ ኮይሱዋሴ። 10 ዒንሢ፡ ማቂዶኒያ ዓጮ"ይዳ ዓኣ ዒሾንሢንታ ሚሾንሢንታ ቢያ ናሽካኔ፤ ጋዓንቴ ታ ዒሾንህ! ታ ሚሾንህ! ሃሢ ኑ ዒንሢ ዘራ ዘራ" ባሼ ዒንሢ ናሽካንዳጉዲና፤ 11 ሃያኮ ቤርታ ኑ ዒንሢም ኬኤዜሢጉዲ ናንጎ

ዲንሢሲ ዲንሢሢ ዔሪ ርንጋንዳጉዲና ዲንሢሢ ዛሎ" ማላንዳጉዲና ሐሣ ዲንሢሢ ወይሣኒ ዲንሢሢ ኩቻ ዲንሢሢ ማዳንዳጉዲ ጌይኬ።
12 ዬያይዲ ያኦሲ ጉሙርቁዋ ዓሶ ባኣካ" ቦንቸንጉቴ ዓሲ ማዒ ሃሣ ዓሲ ሜታሱቆያ ማዒ ዲንሢሢ ርንጋንዳጉዲኬ።

ጎዳኮ ሙኪያ ኬሎ"ና ማዓንዳ ባኮ

13 ታ ዲሾንሦ! ታ ሚሾንሦ! ወዛባኣ ዓሶጉዲ ሐይቁ ዓሶ ዛሎ" ዲንሢሢ ያዩዋጉዲ፤ ሃሣ ዔያታ ወይታንዳቴያ ጎኑሞ ዲንሢሢ ዔራንዳጉዲ ኑ ኮዓኔ። 14 ዬሱሴ ሐይቁ ሃይባ"ጋ ዔቁሢ ኑ ዔራኔ፤ ዬያሮ ኪሪሰቶሴ ጉሙርቁ ዓኣዎ ሐይቁዘንሢ ኪሪሰቶሴና ዎላ" ያኦሲ ዔኪ ሙካንዳኔ።

15 ጎዳ ጌዔ ጎይያና ኑ ዲንሢሢ ሂዚ ጋዓኔ፡- ጎዳ ሙካንዳያ ሄላ"ንዳኣና ኑኡኒ ሃይቁባኣዎ ዓኣ ዓሳ ሃይቁ ዓሶ ኑ ቢራዓኬ።

16 ዴኤፒ ዓይሥሢ ዲላቲ" ዑኡሲ፣ ያኦሲ ኪኢታንቸ ሱኡጋሢ ዑኡሲና ያኦሲ ዛዬያ ወይዘንታንጉቴ ጎዳ ፔኤሮ ጫሪንጫፓ ኬዳ"ንዳኔ፤ ዲማ"ና ኪሪሰቶሴ ጉሙርቁ ዓኣዎ ሃይቁዘንሢ ቤርታዲ ዔቃንዳኔ። 17 ዬካፓ ኑኡኒ፣ ሃይቁባኣዎ ዓኣ ዓሳ ጎዳ ዠባሮ ዑያ ኬሰኪ ሞኦኪ ዔካኒ ሻኣሮ ባኣኮ" ሳዓፓ ኑ ዔውታንዳኔ፤ ዬያይዲ ያኦሲና ዎላ" ርንጊና ኑ ርንጋንዳኔ። 18 ዬያሮ ሃያ ቃኣሎ"ና ዎሊ ደዲሹዎቴ።

5

ጎዳኮ ሙኮ ጊኢጊንቲ ካፒሢ

1 ታ ዲሾንሦ! ታ ሚሾንሦ! ዬይ ባካ ማዓንዳ ዎድ"ና ሌዎና ዛሎ" ዲንሢሢ ታ ያኣፓኒ ኮዑዎሴ። 2 ዓይጎሮ ጌዔቴ ጎዳ ሙካንዳ ኬላ" ዉሲ ዲሚና ሙካሢጉዲ ማዓንዳሢ ዲንሢሢ ዲንሢሢ ቶኦኪና ኮሺ" ዔራኔ። 3 ዓሳ፡- «ዔኤቢ ባኣሴ፣ ኮሺኬ» ጌይ ማላንጉቴ ባይሲንታ ዔርቲባኣንጉቴ ጎጂንዶ ሾይቺ ዓርቃሢጉዲ ዔያቶይዳ ሙካንዳኔ፤ ዎይቴቴያ ዔያታ ቶላ"ዓኬ። 4 ዲንሢሢ ጋዓንጉቴ ታ ዲሾንሦ! ታ ሚሾንሦ! ዲሚዳቱዋኣሢሮ ዬና ኬሌላ ዉሲጉዲ ዔርቱዋንጉቴ ዲንሢሢ ኮይላ" ሙካዓኬ። 5 ዎይቲ ጌዔቴ ዲንሢሢ ቢያሢ ፖዒሞ ማዔ ዓሲ፤ ሐሣ ሮኦሪሞ ማዔ ዓሲኬ። ኑኡኒ ዋንቶ ሃሣ ዲሞሮ ማዔ ዓሲቱዋሴ። 6 ዬያሮ ኑኡኒ ጴጪ፣ ኑና ኑ ዔሪ ወይሣ ዓሲ ማዓንዳኣፓዓቴሞ ሐንጎዋቶጉዲ ኑ ጊንዒባኣቴ ቃራኬ። 7 ጊንዓ ዓሳ ዲሚና ጊንዓኔ፤ ማሢንታ ዓሳኣ ዲሚና ማሢንታኔ፤ 8 ኑኡኒ ጋዓንጉቴ

4:17 1ቆሮ. 15፡51-52። 5:2 ማቴ. 24፡43፤ ሉቃ. 12፡39፤ 1ጴ፪. 3፡10።

ፖሊዮም ማዕ ዓሲ ታሠረ ኑና ኑ ዔሪ ወይሁ፣ ኮይሳ ናንገ ኑ ናንጎም፤ ያኦሲ ጉሙርቁሠና ናሹሞና ያልዚሮ ዳዳ ማኦ ዓንጎጉዲ ኑ ማይንቲ፣ ዳቁንቶኮ ሃጊ ማዓንዳ ወዘ"ዋ ቶኦካ ዓጎ ያሎ ቆኦ"ጉዲ ኑ ዓጎም፤ 9 ያኦሲ ኑና ማሊ ዔኤሌ"ሠ ሜቶ ኑም ዒንጋጌቱዋንቲ ኑ ጎዳሠ ዩሱሰ ኪሪሰቶሴ ዛሎ"ና ዳቁንታ ኑ ዴንቃንዳጉዲኬ። 10 ኪሪሰቶሴ ኑ ጋይቲ ሓይቁሠ ሼምፔና ኑ ዓኣቲያ ሓይቁቲያ ዒዛና ዋላ" ኑ ናንጋንዳጉዲኬ። 11 ዩያሮ ሃሠ ዒንሠ ማዳ ጎይያ ፔቲ"ይ ባጋሠ ደዲሺ ዔቁሲሠና ዋሊ ማኦዲ"ዋቲ።

ጋፒንሠ ሃይሴና ሳራሥሠ

12 ታ ዒሹንሠ! ታ ሚሹንሠ! ዒንሠ ባኣኮ"ይዳ ማዳ"ና ላቢ"ንታዘንሠ፣ ጎዳ ዩሱሴ ዛሎ"ና ዒንሠኮ ሱኡጎ ማዔዘንሠና ዘራ ዓሶ ዒንሠ ስንቻንዳጉዲ ኑ ዒንሠ ሺኢቃኔ፤ 13 ዔያታ ማዳ ማዳ"ሮ ስንቹ፣ ሃሠ ዔያቶ ናሽካያ ማዑዋቲ፤ ዒንሠያ ዋላ" ኮሺ ናንጉዋቲ።

14 ታ ዒሹንሠ! ታ ሚሹንሠ! ማዳ ማዳ"ዋ፣ ቤልፃዳ ዓሶ ጎሩዋቲ፤ ዒገጫ ዓሶ ደዲሹዋቲ፤ ላቢ"ንታ ዓሶዋ ማኦዲ"ዋቲ፤ ዓሲ ቢያና ገቢ" ዳንዳዒ ናንጉዋቲ። 15 ዒንሠ ባኣካ"ፓ ያኦኢያ ባጋሠም ፑርታ ማዳ ዛላ ፑርታ ማሠዋጉዲ ዒንሠና ዔሩዋቲ፤ ዩያይዳፓ ፔቲ"ሠ ባጋሠም ኮሺ ማዳኒ ማሎንጎ፤ ዩያጉዲ ሜሌ" ዓሲማኣ ቢያ ኮሺ ማዳኒ ደደንጎ።

16 ቢያ ዎዴ ዎዛዲዋቲ፤ 17 ሓሹ"ዎ ዎ ዎ ያኦሲ ሺኢቁዋቲ፤ 18 ቢያ ባኣዚ"ና ያኦሲ ጋላቲዋቲ፤ ዓይጎሮ ጌዔቲ ዒንሠ ዩሱሰ ኪሪሰቶሴና ማዒ ናንጋኣና ያኦዛሠ ዒንሠዳፓ ኮዓሠ ዩያታሠሮኬ።

19 ዓያና ጌኤሺኮ ማዳ" ደኡኪ ባይዚፖቲ፤ 20 ያኦሲ ማሊሠ ኬኤዚንታ ዎደ"ና ሶሃፖቲ፤ 21 ቢያ ባኮ ዛገ ዔሩዋቲ፣ ኮሺ ማዔ ባኮ ዔኩዋቲ፤ 22 ዓይጎዋ ፑርታ ባኣዚ"ፓ ቢያ ሃኩዋቲ።

23 ኮዥ ያኦዛሠ፣ ዒ ፔኤሮ ዒንሠ ፔኤም ደማሶንጎ፤ ዒንሠኮ ዓያና፣ ዒንሠኮ ሸምፓሠ፣ ዒንሠኮ ዑፆ ቢያ ኑ ጎዳሠ ዩሱሰ ኪሪሰቶሴ ሙካ ኬሎ"ም ሶሃጎ ባኣዚ" ባኣያ ማሃ ዒዚ ካፖንጎ። 24 ዒንሠ ዔኤሌ"ሠ ጉሙርቁንታያ ማዔሠሮ ዩያ ቢያ ባኮ ዒ ማዳንዳኔ።

25 ታ ዒሹንሠ! ታ ሚሹንሠ! ኑማኣ ሺኢቁዋቲ።

26 ዋሊኮ ጌርሲንሠጉዲ ሄርቁ ሄርቁ ኪሪሰቶሴ ጉሙርቃ ዓሶም «ኮሺዳ?» ጌዔኔ፣ ጎዑዋቲ። 27 ሃይ ኪኢታ" ኪሪሰቶሴ ጉሙርቃ ዓሶም ቢያ ናባቢንታንዳጉዲ ጎዳ ሱ"ንያና ታ ዒንሠ ሺኢቃኔ።

28 ኅዳ ዩሱስ ኪሪስቶስኮ ኮሹሞ ዲንጊፃ ዲንሢና ማፖንኅ።

ጌጌዥ ማግኔግ
The Holy Bible in the Maale language of Ethiopia,
using Ethiopic script

copyright © 2015 The Word for the World International and The Bible Society of Ethiopia

Language: Maale

Translation by: The Word for the World

Contributor: Bible Society of Ethiopia

Maale New Testament

by Bible Society of Ethiopia.

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-12-29

PDF generated using Haiola and XeLaTeX on 11 Nov 2022 from source files dated 29 Jan 2022

bbcfb90a-3ae3-5452-983d-6c4c02375929